

INDUSTRIES DEPARTMENT ARSI LIANTE

*Lalzabiaka,
Deputy Director of Industries (Retired)*

Mizoram Industries Department lo kaihruai hmasatute hi ka ngaihtuah lêt hian an hlu ka va ti êm. An ngaihsânawmin, keini, an hnunga mite hian kan tluk lo ka va ti êm! Hre chiang hman lo eng emaw zât kan awm tawh mai thei a. An chanchin ka hriat theih \henkhat tal han tihlan loh atân chuan a uiawm ka ti tlat mai. Ka hriat phâk loh leh ka hriat zui theih loh te pawh an awm ngei ang. Ka hriat theih tlêm tal chu han tihlan ka duh tlat. Tih dik loh palh a awm chuan an chhûngte ngaidam ka dil e.

Pu Thanhnuna B. Tech (Mech.) (L):

Pu Thanhnuna hi a pa chu Pu P.S. Dahrawka (L) niin, a nu chu Pi Kai\huami (L) a ni a. January 5, 1938-ah Aizawlah a piang a ni.

Primary School leh Middle School chu Dawrpui School-ah a zo a.

High School chu Gov't Mizo High School, Aizawlah kalin Matric chu kum 1955-ah First Division-ah a pass. St. Edmund's College, Shillong-ah Intermediate of Science (I.Sc) zirin First Division-ah a pass a. Scottish Church College-ah B.Sc zirin, hetih lai hian All India Competitive Exam-ah inziak tlingin Indian Institute of Technology, Madras-ah zirin January, 1965-ah Bachelor of Technology (Mechanical) 2nd Division High-ah a pass chhuak a. Mizo zinga Mechanical Engineer hmasa ber a ni.

April, 1965-ah Assam Cement Company hnuaiiah Assistant Engineer hna hmuin Mawmluh Cement Factory-ah kum khat chung a thawk a. April, 1966 a\anga August, 1974 thleng Assam Oil Company hnuaiiah Digboi-ah Assistant Engineer hna a thawk leh a.

Mizoramah lo chhuakin Mizoram sawrkâra Rural Industries Project (R.I.P)-ah September, 1974 a\angin Project Officer hna a rawn thawk a. 1979-ah R.I.P chu District Industries Centre a lo nih khan General Manager a ni zui leh nghal a. 1983-ah Director of Industries-ah a kaisâng leh a.

July, 1989-ah 'deputation'-in Mizoram Khadi & Village Industries Board-ah Chief Executive Officer nihtir a ni a. Kum 1992-ah Director of Industries (Technical)-in dah leh a ni a. Hei hi a thih ni thlengin a chelh a ni.

A la thawh laiin, April 28, 1996 khan chatuan ram min lo pansan ta a ni.

Amah hi Mizo paah chuan pa lian tak mai a ni a. A pa len ang hian a rilru pawh a dam duam mai a. A hnuaiia Officer-te hi a ring zo êm êm mai a ni. A thiamna avànga Mizorama lâk chhuah a ni a, Industries Department sùlsutu a ni a. A thawhna hmasa Assam Oil Company (tunah chuan Indian Oil Company-ah inchhûng lût tawhin, Assam Oil Division tih a ni ta a) hnuaiiah khan thawk zui reng ni ta se State sawrkâr hnuaiia Department pakhat Director nihna aia sâng zâwk, hlawh leh ham\hatna (facility/perk) \ha zâwk dinhmun a thleng tawh zâwk ang em tih hi ngaihtuah tham a ni. A uiawm ngawt mai.

Pu K. Thanzauva, B. Com., ITS (L):

Pu K. Thanzauva hi a pa chu Bula (L) niin, a nu chu Rengkungi (L) a ni a, January 7, 1935-ah Muallungthu khuaah a lo piang a.

A naupan lai a\anga mi tumruh leh rual el tak a ni. Primary leh Middle School chu Boys' M.E. School-ah a kal tluan a. 1955-ah Gov't Mizo High School a\angin Matric a pass a. 1957-ah Intermediate of Commerce (I. Com), D.M. College, Imphal a\angin a zo va, Shillong-ah College kal chhuzawm leh in B. Com chu 1960-ah a pass leh a ni.

I. Com a pass kum hian Shillong-ah Industries Department-ah L.D.A(L.D.C ni ta) hna a thawk a. Extension Officer (Industries)-ah inziak tling leh in, a hnu-ah Superintendent of Industries-ah kaisang leh in, Tinsukia, Jorhat-ah te a thawk a. Mi tumruh tak a nih angin All India Competitive Exam hmachhawn leh in Mizo zinga Indian Trade Service tling hmasa ber a ni a, 1969-ah Asst. Controller of Imports & Exports hna chelhin Calcutta (tuna Kolkata ni ta)-ah a awm a. 1974-ah 'deputation'-in Mizoramah Asst. Director of Industries (Handloom)-in a rawn awm a. Hetih chhûng hian a 'parent service' lamah Controller of Imports & Exports-ah kaisantir a ni a. 1981-ah Mizoram sawrkâr hnuaiah lut nghetin 1982-ah General Manager-ah kaisantir leh niin District Industries Centre, Lunglei leh Aizawlah te a awm a. 1988-ah Joint Director of Industries (Handloom & Handicrafts)-ah kaisantir leh niin, March 31, 1996 khan superannuation pension-in a chhuak ta a ni.

A hnathawhah \hahnem a ngai thei hle a. Mizoram Khadi & Village Industries Board leh ZOHANDCO dinnaa sùlsutu zinga mi a ni a. Thenzawla Handloom Complex din theih nana sùlsutu a ni bawk. Puantah (handloom) leh kut themthiam thil (handicraft) hi a tuipui êm êm a, dârkâr khat chuang tui takin a sawi thei. Manipur a\anga puantahsa la lût \hinin kan thawn chhuak zâwk ta hi a \hanemngaihna zâr tih loh theih loh a ni.

Mizo khumbeu hi a ngaisang a, kan hnam rohlu a nih hriain 'patent' theih a duh thu a sawi \hin a, A \hahnemngaihna leh hmalâknain, kum 1976-a Republic Day, Aizawla lawmnaah Khumbeu lian zet mai Industries Department Tableau-ah entir a ni nghe nghe.

Zai ngaina leh nuam ti a ni a, infiamna, a bikin Badminton a ngainain nuam a ti a, Inter-Departmental Sports-ah pawh a tel \hin. Zin chhuah nikhua pawhin racket kengin a remchâna apiangah a khêl \hin. Motor khalh pawh a thiam hle.

June 14, 2007-ah chatuan ram min lo pansan ta a ni.

Pu Thanhawla B.A (L):

Pu Thanhawla hi a pa chu Durra Chawngthu (L), Zion Street thlaa D.C. Market tih hming putu/put chhan saw niin, a nu chu Sailochhingi (L) a ni a. Durtlangah August 10, 1930-ah a lo piang a ni. A pa Pu Durra Chawngthu hi, hriat theih china Mizo zînga Engineering zir hmasa ber a ni. Tin, Kristian Hlabu a hla No. 83, 421 leh 473 lettu hi a ni bawk. A chanchin hi sawi tham a awm a ni.

Aizawla sei lian niin, Primary leh Middle School chu Dawrpui School-ah a zir chhuak a. Matric chu St. Anthony's School, Shillong a\angin 1951-ah chhuakin, I.A (Intermidate of Arts) kum 1954 leh B.A pawh St. Anthony's College, Shillong a\angin kum 1956-ah a pass a ni.

June 21, 1960-ah Extension Officer (Industries)-in Mamit C.D. Block (Community Development Block, Rural Development Block tih ni ta)-ah a lut a. A luh hnu lawkah Small Industries Service Institute [tuna Micro, Small and Medium Enterprises-Development Institute (MSME-DI ni ta)], Calcutta-ah thla 4 chhûng leh, a hnu deuh lawkah bawk Khadi Gradyog Vidhalaya, Wardha, Maharastra-ah thla 8 chhûng Training-in a kal nghal a. May, 1965-ah Champhai C.D. Block-ah sawn (transfer) a ni leh a. 1966-ah rambuai a lo nih khan Champhaiah

hian 1967 a\anga 1971 thleng Supply in-charge a ni. 1971 leh 1972 khan Hnahlanah Administrative Officer-in dah leh a ni a.

Kum 1973 a\angin District Industries Office (DIC a la nih hma), Aizawlah awmin 1974 a\angin Directorate-ah Loan & GIA Section-ah a awm zui leh a. Shillong-ah (a kum hriat chiah loh) chawlhkâr hnih awh 'Management & Development of Cottage & Small Industries in North Eastern Region'-ah a kal leh a. Kum 1976 tâwp lamah, thla khat awh Training, SIETI (Small Industry Extension Training Institute), Hyderabad-ah a nei leh. [SIETI hi a hnu-ah 'ni-siet' tih niin, tânah chuan 'ni-msme; tih a ni leh tawh a]. Kum 1985-ah kâr khat awh, (October-November), 'Course on Strategy for Rural Industrialisation' chu National Institute of Rural Development (NIRD), Gauhati (Guwahati ni ta)-ah a training bawk.

July 23, 1977-ah Superintendent of Industries-ah kaisantir niin Lungleiah 1979 thleng a awm a. September 25, 1979-ah District Industries Officer-ah kaisantir lehin Saihaah April, 1981thleng a awm leh a. April 6, 1981-ah Deputy Manager-ah kaisang lehin District Industries Centre, Lungleiah a awm leh a. October 17, 1985-ah Project Manager-ah kaisang lehin August 31, 1991-a superannuation pension-a a chhuah thlengin he hna hi a chelh a ni. Project Manager a nih chhûng hian thla sarih zet chu General Manager 'charge' pawh a la a ni.

Amah hi pa nêlawm tak ni bawk, pa zahawm tak ni bawk si a ni. Jawng tam lo, \awngkam thiam lêm lo tak a ni chungin pa ngainatawm tak a ni a. Ramvachal, ram vah peih leh nuam ti tak niin, sapui ni lo, sava chu a kâp tam viau a. Music ngaina tak a ni bawk

November 13, 1998 khan chatuan ram min lo pansan ta a ni.

(chhonzawm leh tur)

Industry Meichher
Jan-Mar, 2019